

PELAN PEMBANGUNAN EKONOMI ASNAF BERLANDASKAN MAQASID SYARIAH: KAJIAN DI LEMBAGA ZAKAT NEGERI

Asnaf's Economic Development Plan Based on the Principle of Maqasid Syariah: Study on State Zakat Board

Rabiatul Adawiyah Che Halim¹

Selamah Maamor²

Zakaria Abas³

^{1, 2, 3} Pusat Pengajian Perniagaan Islam, Universiti Utara Malaysia, Kedah, Malaysia

*Corresponding author (Email: rabiatul_adawiyah26@oyagsb.uum.edu.my)

Received: 7 January 2023, Reviewed: 20 January 2023, Published: 31 March 2023

Abstrak: Kertas kerja ini merupakan perbincangan awal mengenai pelan pembangunan ekonomi asnaf berdasarkan prinsip Maqasid Syariah. Prinsip Maqasid Syariah yang diketengahkan dalam kajian ini ialah merangkumi elemen pemeliharaan agama, jiwa, akal, keturunan dan harta. Justeru, kajian ini membincangkan usaha pembangunan ekonomi asnaf yang dibangunkan serta telah dilaksanakan oleh Lembaga Zakat Negeri Kedah (LZNK) di Smart Sawah Berskala Besar Asnaf (SSBBA), Yan Kedah. Tinjauan awal ini mengaplikasikan kaedah kajian berbentuk kualitatif dan data-data penyelidikan pula dikumpulkan oleh penyelidik menggunakan teknik pengumpulan data seperti kajian kepustakaan serta analisis dokumen. Hasil penelitian dan penganalisisan menunjukkan bahawa hal-hal berkaitan pembangunan ekonomi asnaf perlu berlandaskan Maqasid Syariah serta berupaya untuk diaplikasikan dalam pengurusan organisasi zakat supaya nilai pembangunan tersebut mampu memperbaiki keadaan kehidupan manusia sebagai khalifah di muka bumi.

Kata Kunci: Pembangunan Ekonomi Asnaf, Maqasid Syariah, Pengurusan Zakat, Kajian Kepustakaan, Metod Kualitatif

Abstract: This working paper is a preliminary discussion of the asnaf economic development plan based on the principle of Maqasid Shariah. The principles of Maqasid Shariah highlighted in this study include the elements of protection of faith, life, intellect, lineage and property. Thus, this study discusses the asnaf economic development efforts developed and implemented by the Kedah State Zakat Board (LZNK) in Smart Sawah Berskala Besar Asnaf (SSBBA), Yan, Kedah. This preliminary survey applied qualitative research methods and data was collected by researchers using data collection techniques such as literature review and document analysis. The results of research and analysis show that matters related to the economic development of asnaf need to be based on the Maqasid Shariah and be able to be applied in the management of zakat organizations so that the development value can improve the condition of human life as a caliph on earth.

Keywords: Economic Development of Asnaf, Maqasid Shariah, Zakat Management, Literature Review, Qualitative Method

PENGENALAN

Konsep pembangunan berdasarkan perspektif Islam telah digariskan dalam Al-Quran dan turut dihuraikan dengan jelas dalam hadis-hadis seterusnya menjadi topik perbincangan oleh para sarjana Islam sejak dahulu. Konsep tersebut termasuklah objektif pembangunan itu sendiri untuk memperbaiki ekonomi, sosial, intelek dan etika manusia sebagai khalifah berpandukan syariat (Hameed & Bashir, 2002). Oleh yang demikian, merujuk kepada isu berkaitan pembangunan ekonomi yang sangat luas diperkatakan hari ini ianya penting untuk diperhalusi oleh pemerintah dan pemimpin masyarakat. Tanggungjawab pemerintah dan pemimpin masyarakat untuk melaksanakan pembangunan ekonomi kepada ummah selaras dengan apa yang dinyatakan dalam al-Quran pada surah an-Nisa ayat 58 yang bermaksud:

“...Sesungguhnya Allah menyuruh kamu menyerahkan amanah kepada ahlinya (yang berhak menerima), dan apabila kamu menetapkan hukum antara manusia, (Allah menyuruh) kamu menghukum dengan adil. Sesungguhnya Allah (dengan suruhan-Nya itu) memberikan sebaik-baik pengajaran kepadamu. Sesungguhnya Allah maha Mendengar lagi Maha Melihat...”

(Surah An-Nisa : 58)

Berpandukan ayat al-Quran di atas menjelaskan bahawa amanah yang dimaksudkan itu ialah sesuatu yang wajib dipelihara dengan sebaik-baiknya dan diserahkan kepada pemiliknya. Orang yang tidak menjaga amanah dan tidak melaksanakannya maka dia menjadi orang yang khianat. Oleh itu, sebagai pemimpin dalam komuniti Islam yang mana majoriti masyarakatnya adalah golongan B40 termasuk asnaf, maka wajarlah untuk menyediakan pelan pembangunan ekonomi terutama bagi golongan yang mudah terancam ini sebagai salah satu tanggungjawab pemerintah menjalankan amanah kepada pemeliharaan kebijakan masyarakat.

Sebagai tambahan, golongan asnaf merupakan golongan yang mempunyai kepentingan untuk diberikan perhatian oleh pihak berkuasa berkaitan kerana mereka dianggap sebagai golongan kurang bernasib baik dalam pemilikan harta serta layak menerima zakat seperti mana yang telah ditetapkan dalam al-Quran pada surah at-Taubah ayat 60 yang bermaksud:

“...Sesungguhnya sedekah (zakat) itu hanyalah untuk orang fakir, orang miskin, petugas-petugas amil zakat yang menguruskannya, para muallaf yang dijinakkan hati mereka, untuk hamba sahaya yang hendak memerdekaan dirinya, orang yang berhutang untuk (dibelanjakan pada) jalan Allah dan ibnu-al- sabil (musafir yang terputus perbelanjaan) dalam perjalanan. (Ketetapan hukum yang demikian itu) adalah sebagai sesuatu ketetapan (yang datangnya) daripada Allah. Dan (ingatlah) Allah maha mengetahui lagi maha Bijaksana...”

(Surah at-Taubah: 60)

Oleh yang demikian, institusi zakat dilihat sebagai pihak yang paling bertanggungjawab untuk menguruskan pengagihan zakat kepada golongan ini supaya hak mereka diperolehi dengan adil. Justeru, Kedah melalui LZNK mengambil inisiatif menerajui satu program iaitu

Zon Pembangunan Ekonomi Ummah (ZPEU) menyasarkan golongan asnaf untuk dibantu dan diperkasakan. Program yang bermula di daerah Yan ini mengetengahkan usaha membangunkan asnaf serta komuniti setempat bersama-sama mengusahakan projek dinamakan Smart Sawah Berskala Besar Asnaf (SSBBA).

Matlamat kajian awal ini ialah untuk membincangkan tentang usaha perlaksanaan pembangunan ekonomi asnaf yang telah dilakukan oleh LZNK seterusnya mengenal pasti sejauh mana perlaksanaan tersebut mendasari prinsip *Maqasid Syariah* iaitu pemeliharaan agama, jiwa, akal, keturunan dan harta.

KAEDAH PENYELIDIKAN

Tinjauan awal ini mengaplikasikan pendekatan kajian berbentuk kualitatif. Kajian kualitatif tersebut termasuklah kaedah penganalisisan data sekunder. Terdapat beberapa klasifikasi data sekunder yang boleh digunakan dalam kajian dan data-data sekunder tersebut dikelaskan kepada tiga sub-kategori iaitu data sekunder berdokumen, data sekunder pelbagai-sumber dan tinjauan. Oleh itu, penyelidik memilih untuk menggunakan data sekunder berdokumen dan data sekunder pelbagai-sumber dalam kajian perbincangan awal ini sebagai usaha mencapai objektif memahami perlaksanaan pelan pembangunan ekonomi asnaf oleh organisasi zakat berdasarkan prinsip *Maqasid Syariah*.

Selanjutnya, penyelidik akan mengaplikasikan teknik pengumpulan data seperti kajian kepustakaan dan analisis dokumen dalam kajian awal ini. Kajian kepustakaan yang dilakukan ialah melibatkan pengumpulan data daripada al-Quran, hadis, buku, jurnal dan artikel berkaitan elemen-elemen *Maqasid Syariah* yang dibincangkan oleh sarjana-sarjana Islam terdahulu serta aspek pembangunan ekonomi asnaf. Manakala kaedah analisis dokumen daripada bahan-bahan bertulis seperti laman web organisasi zakat dan bahan-bahan penerbitan yang berkaitan dipercayai mampu membantu penyelidik untuk lebih memahami bagaimanakah perlaksanaan pelan pembangunan ekonomi asnaf yang dibangunkan oleh LZNK di Smart Sawah Berskala Besar Asnaf (SSBBA), Yan Kedah.

KAJIAN LITERATUR

Pembangunan Ekonomi

Aspek pembangunan merupakan elemen penting dalam sesebuah negara. Menurut Pustaka D. B., (2017) perkataan pembangunan membawa maksud usaha atau kegiatan membangunkan (memajukan dan mengembangkan). Manakala ekonomi pula membawa maksud ilmu berkaitan pengeluaran, pengagihan, penggunaan barang-barang dan perkhidmatan sama ada oleh individu dalam sebuah rumahtangga atau dalam konteks sesebuah negara yang melihat kepada kekayaan atau kebendaan (Pustaka D. B., 2017). Terdapat tiga jenis pembangunan yang sering dibincangkan dalam kajian-kajian terdahulu iaitu pembangunan ekonomi, pembangunan manusia dan pembangunan kesejahteraan. Merujuk kepada pembangunan ekonomi ianya memberi gambaran tentang tahap pencapaian kemanusiaan dan sosial, pengagihan pendapatan serta ukuran pendapatan per kapita (Abdullah, et al., 2018). Pembangunan ekonomi dari sudut Islam pula berbeza dengan konvensional di mana ianya dilihat sebagai aktiviti dan proses pelbagai dimensi yang mengintegrasikan pembangunan manusia dan sosial (Abdullah, et al., 2018). Ini bermakna pembangunan ekonomi dari

perspektif Islam dilihat secara menyeluruh dalam pelbagai aspek termasuklah pembangunan material dan spiritual.

Terdapat beberapa ayat al-Quran yang menyentuh berkaitan pembangunan ekonomi. Salah satu daripadanya ialah pada surah al- Qasas ayat 77 yang bermaksud:

“...Dan carilah pahala dan kebahagiaan hari akhirat dengan harta kekayaan yang telah di anugerahkan Allah kepadamu, tetapi jangan kamu lupakan bahagianmu (keperluan dan bekalanmu) di dunia dan berbuat baiklah (kepada orang lain) sebagaimana Allah telah berbuat baik kepadamu (dengan pemberian nikmat-Nya yang melimpah ruah). Janganlah kamu berbuat kerosakan di bumi. Sesungguhnya Allah tidak menyukai orang yang berbuat kerosakan...”

(Surah Al-Qasas : 77)

Berdasarkan ayat ini, Allah SWT memerintahkan umat manusia untuk berusaha mencari harta kekayaan yang telah dilimpahkan oleh-Nya melalui amal kebajikan yang mendatangkan pahala, keselamatan dan kebahagiaan di hari akhirat. Pada masa yang sama Allah SWT juga mengingatkan supaya tidak melupakan bahagian di dunia ini iaitu merasai kesenangan yang halal sebelum dapat menikmati kesenangan yang kekal di akhirat. Allah juga memerintahkan umat manusia untuk membantu orang yang memerlukan bantuan dengan perantaraan harta kekayaan dan pangkat serta pengaruh yang mana semua itu dikurniakan oleh Allah SWT. Di akhir ayat ini, Allah SWT sekali lagi mengingatkan supaya umat manusia tidak melakukan sesuatu perkara yang boleh merosakkan masyarakat kerana perbuatan tersebut akan dimurka oleh Allah SWT.

Islam telah merangka sistem ekonomi yang akan membantu mengurangkan kemiskinan dalam sesebuah masyarakat sehingga sistem tersebut mampu memberi impak positif kepada ekonomi selain daripada mendapat ganjaran daripada Allah SWT jika diamalkan (Yakubu & Usman, 2019). Sistem ekonomi Islam tersebut mempunyai elemen kebajikan sosial yang terdiri daripada agen dan institusi ekonomi yang berbeza termasuk perbendaharaan awam(baitulmal), institusi zakat, badan wakaf, NGO, institusi kebajikan, individu, perniagaan dan institusi kewangan (Abdullah, et al., 2018). Oleh yang demikian, jelaslah bahawa Islam mengambil kira elemen tanggungjawab sosial dalam pengurusan sesebuah negara terhadap kebajikan masyarakatnya melalui sistem ekonomi yang berlandaskan syariat. Hal ini turut diperkatakan dalam sebuah hadis tentang pensyiaratan zakat sebagai medium pengagihan harta daripada golongan kaya kepada golongan miskin di mana melalui pengagihan ini harta tersebut tidak berlegar kepada satu golongan sahaja (golongan kaya) sehingga mewujudkan jurang ketidaksamaan dan penindasan terhadap golongan miskin. Hadis dan terjemahan yang dimaksudkan ialah seperti berikut:

“...Abu Asim Al- Dakhak bin Mukhallad memberitahu kami, dari Zakaria bin Ishaq, dari Yahya bin Abdullah bin Saifi, dari Abi Mubad, dari Ibnu Abbas RA, Sesungguhnya Nabi SAW mengutuskan Muaz RA ke Yaman lalu baginda SAW bersabda : “Serulah mereka kepada penyaksian bahawa Tiada Tuhan yang Disembah Melainkan Allah dan Aku (Nabi Muhammad SAW) adalah utusan Allah. Sekiranya mereka mentaati kamu dalam perkara itu, maka ajarkan

mereka bahawa Allah telah mewajibkan ke atas mereka solat 5 waktu sehari semalam. Sekiranya mereka mentaati kamu dalam perkara tersebut, maka ajarkan mereka bahawa Allah telah mewajibkan zakat pada harta mereka yang dipungut dari orang-orang kaya mereka lalu dikembalikan kepada orang-orang miskin mereka...”

Keadaan sosioekonomi sesebuah negara mempunyai hubungan yang amat rapat dengan syariat Allah. Salah satu daripada syariat tersebut ialah melalui zakat kerana ia berkisar tentang harta terutamanya dalam perkara yang berkaitan dengan pendapatan, penghasilan, pengeluaran dan pengagihan (Khafidz, 2017). Selain itu, institusi zakat juga dijangka memainkan peranan penting dalam pengagihan pendapatan dan peruntukan melalui fungsinya sebagai jaringan keselamatan untuk membantu fakir dan miskin (Hameed & Bashir, 2002). Menurut Abdullah, et al., (2018) objektif utama zakat adalah untuk menarik seorang Muslim keluar dari kesusahan ekonomi dengan menyediakan keperluan asas bagi mereka. Oleh yang demikian, Islam melalui pensyariatan zakat mempunyai matlamat dan hikmatnya yang tersendiri. Pemahaman serta penghayatan mendalam terhadap segala matlamat tersebut diperlukan melalui pendekatan *Maqasid Syariah*.

Maqasid Syariah

Di era moden hari ini, *Maqasid Syariah* telah diberi perhatian khusus oleh ulama, penyelidik dan sarjana kerana kepentingan dan peranannya dalam proses perundungan serta dapat menangani isu-isu kehidupan kontemporari berdasarkan bukti undang-undang, teks dan peraturan(*syariat*) (Al-Khadami, 2001). Oleh itu, isu-isu kehidupan kontemporari seperti kemiskinan, sosioekonomi, tanggungjawab sosial sesuai untuk diberikan perhatian mengikut landasan *Maqasid Syariah*.

Maqasid Syariah ialah istilah daripada gabungan perkataan bahasa Arab *Maqasid* dan *Syariah*. Perkataan *Maqasid* ialah kata jamak yang diambil daripada perkataan *qasada*, *yaqsidi*, *qasdan* yang secara literalnya mempunyai pelbagai maksud iaitu menunjukkan jalan atau jalan yang lurus; perantaraan atau tidak berlebih-lebihan; mudah atau dekat (Al-Khadami, 2001); mematahkan; dan pegangan atau tujuan (IDE, 2017). Perkataan *Syariah* pula berasal daripada perkataan *syara'a*, *yashra'u*, *shar'an* yang membawa maksud sumber air (Al-Khadami, 2001; IDE, 2017) atau juga disebut sebagai agama, kaedah, kurikulum, dan sunnah (Al-Khadami, 2001). Bagi makna istilah *Maqasid Syariah* secara keseluruhan, ulama awal terdahulu tidak memberikan definisi *Maqasid Syariah* yang jelas, khusus, atau tepat (Bakar, 2021; IDE, 2017 ; Al-Khadami, 2001) namun seringkali ungkapan *Maqasid Syariah* ini dikaitkan dengan *maqasid* lima iaitu pemeliharaan agama, jiwa, akal, keturunan dan harta serta seringkali juga disebutkan sebagai “*masalih daruriyyat, hajiyat., dan tafsiniyyat*” (Al-Khadami, 2001).

Walaupun sarjana Islam terdahulu yang terkenal dalam membahaskan ilmu *Maqasid Syariah* seperti Imam as-Syatibi, al-Juwaini, al-Ghazali dan ‘Izz al-Din ‘Abd al-Salam namun mereka masih juga tidak memberikan definisi *Maqasid Syariah* dengan jelas berdasarkan istilah *Maqasid Syariah* yang sebenar (Bakar, 2021). Secara umumnya, kebanyakan ulama terdahulu membahaskan *Maqasid Syariah* sebagai tujuan, rahsia dan hikmah sesuatu syariat yang mahu direalisasikan secara keseluruhannya supaya syariat tersebut memberi *maslahah(kebaikan)* kepada para hamba-Nya dan menjauhi daripada *maf sadah(keburukan)* di

dunia dan akhirat (IDE, 2017). Berikutan itu, penyelidik berminat untuk lebih memberikan tumpuan pada pandangan sarjana Islam kontemporari yang banyak membincangkan prinsip *Maqasid Syariah* berdasarkan dimensi hal dan keadaan masa kini. Mereka ialah seperti Jasser Auda yang jelas menyatakan bahawa *Maqasid Syariah* sebagai hikmah di sebalik ketetapan dan Ibnu Asyur yang menyatakan bahawa *Maqasid Syariah* adalah objektif syariat bersifat pelbagai serta banyak di mana sebahagiannya merupakan tujuan atau matlamat umum manakala bahagian yang lain pula ialah tujuan dan matlamat khusus (Jasser Auda, 2008; Ashour, 2004). Kemudian, Bakar (2021) pula memberikan berpendapat tentang *Maqasid Syariah* sebagai kesan kolektif, kumulatif dan gabungan bagi hukum serta undang-undang dari pelbagai ketetapan syariat Islam seperti mana yang terkandung dalam al-Quran dan sunnah Rasulullah SAW. Demikianlah perbincangan awal ini memberi fokus kepada definisi *Maqasid Syariah* yang membawa maksud tujuan, matlamat dan hikmat ke arah mencapai kebaikan dan menolak keburukan di sebalik segala pensyariatan daripada Allah SWT.

Dalam usaha untuk mencapai kebaikan dan menolak keburukan seperti yang dimaksudkan dalam definisi *Maqasid Syariah*, kebanyakan sarjana terdahulu hingga harini menerima bahawa setiap kebaikan itu mempunyai tiga tahap iaitu *daruriyyat*(keperluan), *hajiyyat*(kehendak), dan *tahsiniyyat*(kemewahan) (IDE, 2017). Perkara *daruriyyat* ialah sangat penting untuk kehidupan manusia itu sendiri (Jasser Auda, 2008) dan merupakan komponen asas utama yang perlu diberi penekanan kerana ia berkait rapat dengan soal penjagaan 5 perkara dalam mengukur kemaslahatan manusia (Abdul Rahman et al., 2022) iaitu agama, jiwa, akal, keturunan dan harta (Jasser Auda, 2008). Peranan sebagai khalifah yang dimainkan oleh setiap umat Islam di dunia ini tidak terlepas daripada tanggungjawab memakmurkan dunia dengan sebaiknya mengikut segala peraturan dan syariat yang telah ditetapkan oleh Allah SWT supaya kemaslahatan terutamanya *maslalah daruriyyat* tercapai.

PERBINCANGAN

Masalah seperti kemiskinan dilihat sebagai satu desakan yang boleh menyebabkan kemudaratan atau kerosakan besar dalam pelbagai aspek jika tidak diperbaiki dengan sebaiknya. Di Malaysia, insiden kemiskinan mencatatkan peningkatan pada tahun 2020 berbanding 2019 apabila negara ini berdepan isu pandemik Covid-19 dan ramai dalam kalangan penduduk kehilangan pekerjaan serta punca pendapatan (Jabatan Perangkaan Malaysia, 2021). Bagi negara ini, pertumbuhan ekonominya bukanlah yang paling kukuh, tetapi bersifat inklusif dengan matlamat untuk mengurangkan kemiskinan dan ketidaksamaan pendapatan secara serentak (Huang & Yeung, 2018). Akan tetapi, pada tahun 2020 di mana seluruh dunia termasuk Malaysia dilanda pandemik Covid-19 jelas memberi kesan buruk kepada perkembangan dan pembangunan ekonomi. Apabila peralihan pandemik Covid-19 ke fasa endemik, ekonomi Malaysia telah dicatatkan kekal berkembang dengan pertumbuhan yang tinggi pada suku kedua tahun 2022, namun rakyat negara ini masih perlu berdepan dengan masalah inflasi yang berpunca daripada kekukuhan permintaan dalam negeri, perkembangan harga global dan langkah-langkah dasar dalam negeri (Bank Negara Malaysia, 2022). Masalah ini memberi gambaran jelas bahawa sekalipun faktor luaran seperti pandemik sudah beralih ke fasa endemik, tetapi kesannya masih berlanjutan dirasai oleh masyarakat dalam tempoh yang lama serta usaha ke arah membantu golongan yang terjejas ini diperlukan supaya hal-hal berkaitan kemiskinan dan ketidaksamaan pendapatan tidak memberi kesan negatif kepada pertumbuhan ekonomi dan pembangunan sesebuah negara.

Islam melihat bahawa masalah kemiskinan ini termasuk dalam *maslahah daruriyyat* serta menjadi kunci utama kepada lima elemen *Maqasid Syariah* iaitu menjaga agama, jiwa, akal, keturunan dan harta (Abdul Rahman et al., 2022). Oleh yang demikian, organisasi zakat khususnya Lembaga Zakat Negeri Kedah (LZNK) mengambil inisiatif terbaik sebagai pihak bertanggungjawab dalam pengurusan dan pentadbiran zakat membantu golongan asnaf berkaitan hal kebijakan sekali gus turut membangunkan ekonomi mereka. Inisiatif ini dijalankan di bawah program Zon Pembangunan Ekonomi Ummah (ZPEU) yang mana terdapat satu projek di dalamnya dikenali sebagai Smart Sawah Berskala Besar Asnaf (SSBBA). Projek ini dilaksanakan pada awalnya di daerah Yan sejak tahun 2018 dan mula mengambil peserta dalam kalangan asnaf pada tahun 2021. Projek ini juga menyasarkan lokasi lain untuk diteruskan seperti di daerah Kota Setar, Kuala Muda dan Kubang Pasu berdasarkan keluasan sawah milik LZNK berjumlah kira-kira 700 relung tanah (201.7 Hektar).

Berpandukan kepada program dan projek ini, penyelidik berpendapat ianya berupaya diintegrasikan dengan prinsip *Maqasid Syariah* berlandaskan 5 elemen iaitu pemeliharaan agama, jiwa, akal, keturunan dan harta. Butiran lanjut berkaitan kerangka projek SSBBA dalam Program ZPEU yang diintegrasikan dengan 5 elemen *Maqasid Syariah* seperti yang disebutkan sebelum ini dijelaskan dalam jadual berikut:

Jadual 1: Kerangka Projek SSBBA dalam Program ZPEU Berdasarkan Elemen Maqasid Syariah

Elemen Maqasid Syariah	Perlaksanaan Projek SSBBA dalam Program ZPEU
Agama	<ul style="list-style-type: none"> • Projek SSBBA menyasarkan golongan asnaf secara khusus dalam kalangan B40 dipilih berdasarkan Had Kifayah yang ditetapkan untuk dibangunkan di mana matlamat projek ini ialah untuk mewujudkan kitaran ekonomi dari “asnaf kepada asnaf”. Pendekatan yang dimainkan oleh LZNK dalam pemilihan asnaf sebagai peserta adalah bertepatan dengan kehendak agama Islam sendiri melalui pensyiaran Zakat sebagai medium pengagihan sumber kepada golongan kurang bernasib baik seperti asnaf berdasarkan perintah yang Allah dijelaskan dalam Al-Quran pada surah At-Taubah ayat 60. • Dengan perlaksanaan projek SSBBA ini mampu memberi gambaran bahawa agama Islam menyediakan pelan pengurusan kewangan dan pendapatan yang lengkap melalui kaedah pengagihan zakat kepada asnaf terpilih berdasarkan kapasiti serta keutamaan masing-masing (contohnya fakir dan miskin) sebagai panduan kepada umat Islam juga sesuai diguna pakai oleh keseluruhan masyarakat yang lain. • Bagi golongan asnaf yang terlibat sebagai peserta dalam projek SSBBA ini pula, mereka secara langsung akan diberikan perhatian dalam bentuk pantauan serta sokongan moral daripada pihak LZNK melalui imam yang ditugaskan di setiap daerah. Ini memberikan gambaran bahawa Islam secara totalnya juga turut memfokuskan pembangunan kerohanian dan modal insan bukan sahaja bantuan

material semata-mata demi memelihara akidah setiap umatnya tidak kira dalam apa keadaan sekalipun.

- | | |
|------------|--|
| Jiwa/Nyawa | <ul style="list-style-type: none"> • Perkembangan ekosistem yang dilaksanakan di SSBBA ini mampu memenuhi keperluan asasi asnaf dengan kos yang minima. Ini kerana keperluan asasi bagi asnaf di Negeri Kedah bergantung kepada keperluan beras yang dibekalkan oleh LZNK sebagai usaha kelestarian mereka. • Jumlah kilogram bekalan beras yang diperlukan oleh 578 Pusat Agihan Makanan Fakir dan Miskin (Food Bank) di negeri Kedah ialah sebanyak 2,080,800 kg setahun bagi 208,080 keluarga. Dengan matlamat projek SSBBA yang akan menubuhkan kilang padi milik LZNK sendiri, maka kos agihan zakat terhadap asnaf dapat dikurangkan. • Projek SSBBA ini bermatlamatkan untuk menghasilkan beras berkualiti tinggi di mana beras sebagai sumber makanan utama rakyat khususnya di Kedah dan di Malaysia secara amnya. Langkah ini mencerminkan bahawa perhatian yang diberikan oleh LZNK terhadap kualiti beras mampu memberikan jaminan nutrisi terbaik kepada setiap masyarakat sebagai langkah pemeliharaan nyawa dari risiko kurangnya zat makanan. |
| Akal | <ul style="list-style-type: none"> • Pelan projek SSBBA yang lengkap meliputi modul dan latihan kepada peserta dalam kalangan asnaf seperti modul pertanian pintar, kaedah tanaman hiliran, penternakan, dan penggunaan teknologi baru (sistem pengambilan data kesuburan; sistem pengairan pintar; sistem pengambilan data populasi serangga perosak) berupaya melahirkan pesawah yang pintar “Smart Farmer” dan “Empower Asnaf”. • Inisiatif LZNK dalam projek SSBBA ini berupaya merubah pemikiran golongan asnaf untuk sentiasa berusaha mencari penyelesaian mencapai kejayaan diri keluar dari masalah kemiskinan di hadapi. |
| Keturunan | <ul style="list-style-type: none"> • Peserta-peserta yang dipilih untuk terlibat dalam projek SSBBA terdiri daripada ketua keluarga yang mana masing-masing mempunyai tanggungan. Kriteria pemilihan peserta yang ditetapkan oleh pihak LZNK ini memberi gambaran bahawa kebergantungan sesebuah keluarga asnaf yang ingin dibantu dan dikeluarkan daripada kepompong kemiskinan akan menghasilkan sebuah masyarakat Islam yang berjaya membangunkan modal Insan mereka sendiri tanpa terus mengharapkan bantuan semata-mata. • Projek SSBBA ini bukan sahaja menyasarkan ketua keluarga untuk dibantu, malahan seluruh ahli keluarga turut terlibat sama ada pasangan ataupun waris mereka. Matlamat jangka panjang projek SSBBA adalah melahirkan dan membangunkan ekosistem ekonomi ummah baharu di mana komuniti dalam ZPEU yang terpilih terdiri |
-

daripada pelbagai peringkat umur akan berterusan mengusahakan sawah padi pintar, bekerja kilang, mengusaha kedai makan/restoran dan pelbagai lagi.

Harta

- Para peserta terlibat dengan projek SSBBA diberikan pembiayaan Qard Hasan dalam Pembiayaan Mikro Bangkit oleh Bank Islam Malaysia Berhad. Pembiayaan dalam bentuk pinjaman tanpa melibatkan faedah ini berupaya menjamin sumber pendapatan yang bersih tanpa elemen-elemen tidak dibenarkan Islam. Selain itu, setiap pendapatan per musim yang diterima oleh peserta akan dibuat penolakan zakat secara terus oleh LZNK. Ini akan memastikan setiap peserta terjaga hartanya apabila diperoleh kerana matlamat pembayaran zakat itu sendiri sebagai kaedah menyucikan harta.
- Antara matlamat utama projek SSBBA ini ialah mengeluarkan golongan asnaf yang selama ini menerima zakat menjadi pembayar zakat. Perkara ini menjelaskan usaha ke arah mencari kebaikan pada nilai harta kekayaan melalui pendapatan yang diperoleh itu semuanya untuk membantu seluruh masyarakat.

Sumber: Lembaga Zakat Negeri Kedah, (2022)

KESIMPULAN

Membangunkan rangka kerja berteraskan *Maqasid Syariah* dengan dimensi yang jelas boleh menjadi penanda aras dan mekanisme pemantauan yang terbaik dalam merealisasikan agenda pembangunan ekonomi yang selaras dengan kehendak Allah SWT. Perkara ini telah dibuktikan dengan perlaksanaan program ZPEU oleh LZNK di projek SSBBA Yan, Kedah adalah bertepatan dengan kehendak serta matlamat Syariah. Hasil penelitian dan penganalisisan menunjukkan bahawa hal-hal berkaitan pembangunan ekonomi asnaf perlu berlandaskan *Maqasid Syariah* serta berupaya untuk diaplikasikan dalam pengurusan organisasi zakat supaya nilai pembangunan tersebut mampu memperbaiki keadaan kehidupan manusia sebagai khalifah di muka bumi.

PENGHARGAAN

Penulis merakamkan penghargaan kepada Lembaga Zakat Negeri Kedah(LZNK) kerana membiayai penyelidikan ini menerusi Geran Khas Institut Penyelidikan dan Inovasi Zakat(IPIZ), Universiti Utara Malaysia(UUM)-LZNK bertajuk ‘Program Pembangunan Ekonomi Ummah Sebagai Pencetus Transformasi Asnaf’, Kod S/O 21325. Kertas seminar ini juga adalah sebahagian daripada projek penyelidikan Rabiatul Adawiyah Che Halim bagi PhD (Pengurusan Islam) di Pusat Pengajian Perniagaan Islam, UUM.

RUJUKAN

- Al – Quran. *Tafsir Pimpinan Ar-Rahman Kepada Pengertian Al-Quran*. Putrajaya: Jabatan Kemajuan Islam Malaysia.
- Abdullah, A., Ng, A., Mahfudz, A. A., Pramanik, A. H., Ghani, G. M., Furqani, H., . . . Hasan, Z. (2018). *Islamic Economics Principles and Analysis*. Kuala Lumpur: International Shari'ah Research Academy of Islamic Finance.

- Al-Bukhari, Muhammad bin Isma'il. (2001). *Sahih al-Bukhari*. (Jil.9). Beirut: Dar Tuwaq al-Najah.
- Al-Khadami, N. M. (2001). *Ilmu Maqasid Syariah*. Riyadh: Maktabah Obeikan.
- Ashour, M. a.-T.-T. (2004). *Maqasid Shariah al-Islamiah*. Qatar: Kementerian Wakaf dan Hal Ehwal Islam.
- Bakar, M. D. (2021). *Maqasid al-Shariah The Face and Voice of Shariah*. Kuala Lumpur: Amanie Media Sdn Bhd.
- Hameed, A., & Bashir, M. (2002). *Property Rights, Institutions and Economic Development: An Islamic Perspective* (Vol. 18).
- Huang, F., & Yeung, H. (2018). *Institutions and Economic Growth in Asia*. New York: Routledge.
- IDE, I. D. (2017). *Kompendium Maqasid al- Shariah*. Selangor: IDE Research Centre Sdn Bhd.
- Jabatan Perangkaan Malaysia. (2021). *Laporan Anggaran Pendapatan Isi Rumah dan Insiden Kemiskinan, Malaysia, 2020*. <https://doi.org/10.3>
- Jasser Auda. (2008). *Maqasid al- Shariah A Beginner's Guide* (Anas S. Al Shaikh-Ali & Shiraz Khan, Eds.). The International Institute of Islamic Thought.
- Khafidz, H. A. (2017). *Pentafsiran Asnaf Zakat di Malaysia Mengikut Masa dan Tempat*. Negeri Sembilan: Penerbit USIM.
- Kedah, L. Z. (2022). Berita Semasa. Retrieved from Lembaga Zakat Negeri Kedah: <https://www.zakatkedah.com.my/berita/>
- Malaysia, B. N. (2022, Ogos 12). *Perkembangan Ekonomi dan Kewangan di Malaysia pada Suku Kedua Tahun 2022*. Retrieved from Bank Negara Malaysia: https://www.bnm.gov.my/-/qb22q2_bm_pr
- Pustaka, D. B. (2017). *Kamus Bahasa Melayu*. Retrieved from Dewan Bahasa dan Pustaka: [#Lihatsini](https://prpm.dbp.gov.my/Cari1?keyword=ekonomi&d=102572)
- Pustaka, D. B. (2017). *Kamus Bahasa Melayu*. Retrieved from Dewan Bahasa dan Pustaka: <https://prpm.dbp.gov.my/Cari1?keyword=pembangunan>
- Yakubu, A., & Usman, D. (2019). The Role of Islamic Economic System in Tackling Poverty in a Society. *International Journal of Research and Innovation in Social Science*, 3(3), 2454–6186. www.rsisinternational.org